

Museo Antigüedad Aruba ta den trabou di preparacion pa celebra 30 aña di Himno y Bandera

E museo ta habri porta riba 18 di Maart 2006 cu un cambio di interior y un set up mas interesante y atractivo



ORANJESTAD - Probablemente bo a yega di bishita e Museo interesante aki pero e aña aki lo ta bon pa bo haci esaki atrobe. E motibo pa haci esaki ta ensera un cambio grandi di interior, set up diferente y tur artefacto lo tin nan nomber ariba un plachi. Tambe tin varios artefacto of obheto cu un historia interesante nan tras. Esaki tambe lo ta disponibel pa bo informacion, por ehempel e

guitara di “ciego maravilloso” y datonan di e persona en question.

Fundacion Juan Mario Odor a cuminsa cu preparacion y cambio di interior for di December 2005 y notapornada, pronto Aruba lo bai celebra 30 aña di Himno y Bandera. Tur persona ta haciendo tur nan esfuerzo pa pasa dor di periodo di carnaval trahando ya caba pa 18 di Maart 2006 cu un solo meta: un celebracion di nivel halto na Museo Antigüedad Aruba pa 2006.

Fundacion Juan Mario Odor ultimamente tambe a traha conhuntamente cu hotelnan na Aruba pa promove diferente aspecto di nos cultura den nan propiedad. Den Aruba Marriott Resort nos a logra celebra

Dera Gai, Dande y Carnaval pa medio di exposicion di pintura, musica y baile cu hopi exito. Directora di Fundacion Juan Mario Odor ta considera e periodo di experimento aki hopi importante pa por guia e projectonan via canalnan cu ta traha cu turismo. Ta hopi interesante pa busca strategianan pa traha e brug entre cultura y turismo, un trabou delicado pero cu logronan tremendo tanto pa nos sentido di nacionalismo propio como tambe pa promove mas cultura di Aruba den exterior cu meta turistico.

Dia 18 di Maart 2006 lo no ta un excepcion pa directora Desiree Croes, e dia aki tambe lo bira uno cu por promove pa nos turismo. Un simpel metodo lo wordo usa, esta flyers cu invitacion na Ingles na hotelnan y otro lugarnan cu turistanan ta frecuente.

Tambe pone tour operators y taxistanan, ATA, AHATA y Cruise Tourism na altura cu Museo Antigüedad Aruba ta habri riba e dia special aki sin menciona cu hopi lugar ta sera y por ta un bon oportunidad pa duna bishitante un chens pa wak algo extra di nos pais. Na entrada di Museo bishitante lo ser yama bon bini pa dos dama den shimis di antaño cu lo duna nan un foyeto cu splicacion na Ingles y Papiamentu. Lo tin guia disponibel pa informacion adicional.

E programa di dia ta uno hopi atractivo cu musica live di Tino Ruiz, Etty Toppenberg y recital di poesia di Ruben Odor. Plakaat lo wordo entrega na tres diferente persona como reconocimiento pa nan trabounan. Tambe lo tin un bar y cushina cu snack crioyo. Entrada ta gratis.